

四庫全書薈要

• 乾隆御覽本

子部

欽定四庫全書薈要

子部

晏子春秋卷八

四至

詳校官主事陳本



晏子春秋卷四

內篇

問下第四



出游問于晏子曰吾欲觀于轉附朝舞尊海而南
至于琅琊寡人何修則夫先王之遊晏子再拜曰善哉
君之問也聞天子之諸侯為巡狩諸侯之天子為述職
故春省耕而補不足者謂之游秋省實而助不給者謂

之豫夏諺曰吾君不遊我曷以休吾君不豫我曷以助
一遊一豫為諸侯度今君之游不然師行而糧食貧苦
不補勞者不息夫從上歷時而不反謂之流從下而不
反謂之連從獸而不歸謂之荒從樂而不歸謂之亡古
者聖王無流連之遊荒亡之行公曰善命吏計公掌之
粟藉長幼貧氓之數吏所委發廩出粟以予貧民者三
千鍾公所身見癯老者七十人振贍之然後歸也

景公問于晏子曰昔吾先君桓公善飲酒窮樂食味方

夫好色無別辟若此何以能率諸侯以朝天子乎晏子對曰昔吾先君桓公變俗以政下賢以身管仲君之賊者也知其能足以安國濟功故迎之于魯郊自御禮之于廟異日君過于康莊聞甯戚歌止車而聽之則賢人之風也舉以為大田先君見賢不留使能不怠是以內政則民懷之征伐則諸侯畏之今君聞先君之過而不能明其大節桓公之霸也君奚疑焉

景公問晏子曰昔吾先君桓公從車三百乘九合諸侯

一匡天下今吾從車千乘可以逮先君桓公之後乎晏
子對曰桓公從車三百乘九合諸侯一匡天下者左有
鮑叔右有仲父今君左為倡右為優讒人在前諛人在
後又焉可逮桓公之後者乎

景公問晏子廉政而長久其行何也晏子對曰其行水
也美哉水乎清清其濁不無雩途其清無不灑除是以
長久也公曰廉政而邀亡其行何也對曰其行石也堅
哉石乎落落視之則堅循之則堅內外皆堅無以為久

是以邀亡也

景公問晏子曰請問為臣之道晏子對曰見善必通不私其利慶善而不有其名稱身居位不為苟進稱事授祿不為苟得體貴側賤不逆其倫居賢不肖不亂其序肥利之地不為私邑賢質之士不為私臣君用其所言民得其所利而不伐其功此臣之道也

景公問晏子曰人性有賢不肖可學乎晏子對曰詩云高山仰止景行行止之者其人也故諸侯並立善而不

怠者為長列士並學終善者為師

景公問晏子曰富民安衆難乎晏子對曰易節欲則民富中聽則民安行此兩者而已矣

景公問晏子曰國如何則可謂安矣晏子對曰下無諱言官無怨治通人不華窮民不怨喜樂無羨賞忿怒無羨刑上有禮于士下有恩于民地博不兼小兵強不劫弱百姓內安其政外歸其義可謂安矣

景公問晏子曰當今之時諸侯孰危晏子對曰莒其先

亡乎公曰何故對曰地侵于齊貨竭于晉是以亡也

晏子聘于吳吳王曰子大夫以君命辱在弊邑之地施
貶寡人寡人受貶矣願有私問焉晏子逡巡而對曰嬰
北方之賤臣也得奉君命以趨于末朝恐辭令不審譏
于下吏懼不知所以對者吳王曰寡人聞夫子久矣今
乃得見願終其問晏子避席對曰敬受命矣吳王曰國
如何則可處如何則可去也晏子對曰嬰聞之親疏得
處其倫大臣得盡其忠民無怨治國無虐刑則可處矣

是以君子懷不逆之君居治國之位親疏不得居其倫大臣不得盡其忠民多怨治國有虐刑則可去矣是以君子不懷暴君之祿不處亂國之位

晏子聘於吳吳王曰敢問長保威強勿失之道若何晏子對曰先民而後身先施而後誅強不暴弱貴不凌賤富不傲貧百姓並進有司不侵民和政平不以威強退人之君不以衆強兼人之地其用灋為時禁暴故世不逆其志其用兵為衆屏患故民不疾其勞此長保威強

勿失之道也失此者危矣吳王忿然作色不說晏子曰寡君之事畢矣嬰無斧鑕之罪請辭而行遂不復見

晏子使魯見昭公昭公說曰天下以子大夫語寡人者衆矣今得見而羨乎所聞請私而無為罪寡人聞大國之君蓋回曲之君也曷為以子大夫之行事回曲之君乎晏子逡循對曰嬰不肖嬰之族又不若嬰待嬰而祀先者五百家故嬰不敢擇君晏子出昭公語人曰晏子仁人也反亡君安危國而不私利焉僂崔杼之尸滅賊

亂之徒不獲名焉使齊外無諸侯之憂內無國家之患
不伐功焉湛然不滿退託於族晏子可謂仁人矣

晏子聘于魯魯昭公問焉吾聞之莫三人而迷今吾以
魯一國迷慮之不免于亂何也晏子對曰君之所尊舉
而富貴人所以與圖身出所以與圖國及左右偏適皆
同于君之心者也犒魯國化而為一心魯無與二其何
暇有三夫偏適于君之側者距本朝之勢國之所以治
也左右讒諛相與塞善行之所以衰也士者持祿游者

養交身之所以危也詩曰芄芃棫樸薪之槁之濟濟辟王左右趨之此言古者聖王明君之使以善也故外知事之情而內得心之誠是以不迷也

晏子聘于魯魯昭公問曰大夫儼然辱臨敝邑竊甚嘉之寡人受貺請問安國衆民如何晏子對曰嬰聞傲大賤小則國危慢聽厚歛則民散事大養小安國之器也謹聽節儉衆民之術也

晏子使晉晉平公饗之文室既靜矣以宴平公問焉曰

昔吾先君得衆若何晏子對曰君饗寡君施及使臣御
在君側恐懼不知所以對平公曰聞子大夫數矣今迺
得見願終聞之晏子對曰臣聞君子如美淵澤容之衆
人歸之如魚有依極其游泳之樂若淵澤決竭其魚動
流夫往者維雨乎不可復已公又問曰請問莊公與今
孰賢晏子曰兩君之行不同臣不敢不知也公曰王室
之正也諸侯之專制也是以欲聞子大夫之言也對曰
先君莊公不安靜處樂節飲食不好鐘鼓好兵作武士

與同飢渴寒暑君之強過人之量有一過不能已焉是以不免于難今君大宮室美臺榭以辟飢渴寒暑畏禍敬鬼神君之善足以沒身不足以及子孫矣

晏子使于晉晉平公問曰吾子之君德行高下如何晏子對以小善公曰否吾非問小善問子之君德行高下也晏子蹙然曰諸侯之交紹而相見辭之有所隱也君之命質臣無所隱嬰之君無稱焉平公蹙然而辭送再拜而反曰殆哉吾過誰曰齊君不肖直稱之士正在本

朝也

晏子聘于晉叔向從之宴相與語叔向曰齊其何如晏子對曰此季世也吾弗知齊其為田氏乎叔向曰何謂也晏子曰公棄其民而歸于田氏齊舊四量豆區釜鐘四升為豆各自其四以登于釜釜十則鐘田氏三量皆登一焉鐘乃巨矣以家量貸以公量收之山木如市弗加于山魚鹽蜃蛤弗加于海民參其力二入于公而衣食其一公積朽蠹而老小凍餒國都之市屨賤踊貴民

人痛疾或煥休之昔者殷人誅殺不當僂民無時丈王
慈惠殷衆收卹無主是故天下歸之無私與維德之授
今公室驕暴而田氏慈惠其愛之如父母而歸之如流
水欲無獲民將焉避之箕伯直柄虞遂伯戲其相胡公
大姬已在齊矣叔向曰雖吾公室亦季世也戎馬不駕
卿無軍行公乘無人卒列無長庶民罷弊宮室滋侈道
殫相望而女富溢尤民間公命如逃寇讐藥卻胥原狐
續慶伯降在皂隸政在家門民無所依而君日不悛以

樂愒憂公室之卑其何日之有讒鼎之銘曰昧旦丕顯
後世猶怠況日不悛其能久乎晏子曰然則子將若何
叔向曰人事畢矣待天而已矣晉之公族盡矣肸聞之
公室將卑其宗族枝葉先落則公從之肸之宗十一族
維羊舌氏在而已肸又無子公室無度幸而得死豈其
獲祀焉

叔向問晏子曰齊國之德衰矣今子何若晏子對曰嬰
聞事明君者竭心力以沒其身行不逮則退不以誣持

祿事愔君者優游其身以沒其世力不能則去不以諛
持危且嬰聞君子之事君也進不失忠退不失信不苟
合以隱忠可謂不失忠不持利以傷廉可謂不失信叔
向曰善哉詩有之曰進退維谷其此之謂歟

叔向問晏子曰正士之義邪人之行何如晏子對曰正
士處勢臨衆不阿私行于國足養而不忘故通則事上
使卹其下窮則教下使順其上市君盡禮行忠不正爵
祿不用則去而不議其交友也論身義行不為苟戚不

同則疎而不悻不毀進于君不以刻民尊于國故用於上則民安行於下則君尊故得衆上不疑其身用于君不悻于行是以進不喪亡退不危身此正士之行也邪人則不然用于上則虐民行于下則逆上事君苟進不道忠交友苟合不道行持諛巧以正祿比姦邪以厚養矜爵祿以臨人夸體貌以華世不任于上則輕議不篤于友則好誹故用于上則民憂行于下則君危是以其事君近于罪其交友近于患其得上辟于辱其為生償

干則誅行于下則祗是故交通則辱生患
則危此邪人之行也

叔向問晏子曰事君之倫徒處之義奚如晏子對曰事
君之倫知慮足以安國譽厚足以導民和柔足以懷衆
不廉上以為名不倍民以為行上也潔于治已不飾過
以求先不讒諛以求進不阿久私不誣所能次也盡力
守職不怠奉官從上不敢隨畏上故不苟忌罪故不辟
下也三者事君之倫也及夫大賢則徒處與有事無擇

也隨時宜者也有所謂君子者能不足以補上退處不
順上治唐園考非履共恤上令弟長鄉里不夸言不愧
行君子也不以上為本不以民為憂內不恤其家外不
顧其身游夸言愧行自勤于飢寒不及醜儕命之曰狂
僻之民明上之所禁也進也不能及上退也不能徒處
作窮于富利之門畢志于畎畝之業窮通行無常處之
慮佚于心利通不能窮業不成命之曰處封之民明上
之所誅也有智不足補君有能不足以勞民俞身徒處

謂之傲上苟進不擇所道苟得不知所惡謂之亂賊身
無以與君能無以勞民飾徒處之義揚輕上之名謂之
亂國明君在上三者不免罪叔向曰賢不肖性夫吾每
有問而未嘗自得也

叔向問晏子曰世亂不遵道上辟不用義正行則民遺
曲行則道廢正行而遺民乎與持民而遺道乎此二者
之于行何如晏子對曰嬰聞之卑而不失尊曲而不失
正者以民為本也苟持民矣安有遺道苟遺民矣安有

正行焉

叔向問晏子曰意孰為高行孰為厚對曰意莫高于愛
民行莫厚于樂民又問曰意孰為下行孰為賤對曰意
莫下于刻民行莫賤于害身也

叔向問晏子曰嗇吝愛之于行何如晏子對曰嗇者君
子之道吝愛者小人之行也叔向曰何謂也晏子曰稱
財多寡而節用之富無金藏貧不假貸謂之嗇積多不
能分人而厚自養謂之吝不能分人又不能自養謂之

愛故夫嗇者君子之道吝愛者小人之行也

叔向問晏子曰君子之大義何若晏子對曰君子之大義和調而不緣溪盜而不苛莊敬而不狃和柔而不銓刻廉而不劌行精而不以明污齊尚而不以遺罷富貴不傲物貧窮不易行尊賢而退不肖此君子之大義也

叔向問晏子曰進不能事上退不能為家傲世樂業枯槁為名不疑其所守者可謂能行其道乎晏子對曰嬰

聞古之能行道者世可以正則正不可以正則曲其正也不失上下之倫其曲也不失仁義之理道用與世樂業不用有所依歸不以傲上華世不以枯槁為名故道者世之所以治而身之所以安也今以不事上為道以不顧家為行以枯槁為名世行之則亂身行之則危且天之與地而上下有衰矣明王始立而居國為制矣政教錯而民行有倫矣今以不事上為道反天地之衰矣以不顧家為行倍先聖之道矣以枯槁為名則世塞政

教之途矣有明上可以為下遭亂世不可以治亂說若
道謂之惑行若道謂之狂惑者狂者木石之樸也而道
義未戴焉

叔向問晏子曰何若則可謂榮矣晏子對曰事親孝無
悔往行事君忠無悔往辭和于兄弟信于朋友不諂過
不責得言不相坐行不相反在上治民足以尊君在下
蒞修足以變人身無所咎行無所創可謂榮矣

叔向問晏子曰人何以則可謂保其身晏子對曰詩曰

既明且哲以保其身夙夜匪懈以事一人不庶幾不要
幸先其難乎而後幸得之時其所也失之非其罪也可
謂保其身矣

曾子問晏子曰古者嘗有上不諫上下不顧民退處山
谷以成行義者也晏子對曰察其身無能也而託乎不
欲諫上謂之誕意也上昏亂德義不行而邪辟明黨賢
人不用士亦不易其行而從邪以求進故有隱有不隱
其行法士也迺夫議上則不取也夫上不諫上下不顧

民退處山谷嬰不識其何以為成行義者也

梁丘據問晏子曰子事三君君不同心而子俱順焉仁人固多心乎晏子對曰嬰聞之順愛不懈可以使百姓暴強不忠不可以使一人一心可以事百君三心不可以事一君仲尼聞之曰小子識之晏子以一心事百君者也

栢常騫去周之齊見晏子曰騫周室之賤史也不量其不肖願事君子敢問正道直行則不容于世隱道危行

則不忍道亦無滅身亦無廢者何若晏子曰善哉問事
君乎嬰聞之執二瀟裾則不取也輕進苟合則不信也
直易無諱則速傷也新始好利則無敵也且嬰聞養世
之君子從重不為進從輕不為退省行而不伐讓利而
不夸陳物而勿專見象而勿強道不滅身不廢矣

晏子春秋卷四

晏子春秋卷五

內篇

襍上第五

晏子臣于莊公公不悅飲酒令召晏子晏子至入門公
令樂人奏歌曰已哉已哉寡人不能說也爾何來為晏
子入坐樂人三奏然後知其謂已也遂起北面坐地公
曰夫子從席曷為坐地晏子對曰嬰聞訟夫坐地今嬰

將與君訟敢毋坐地乎嬰聞之衆而無義彊而無禮好
勇而惡賢者禍必及其身若公者之謂矣且嬰言不用
願請身去遂趨而歸管籥其家者納之公財在外者斥
之市曰君子有力于民則進爵祿不辭貴富無力于民
而旅食不惡貧賤遂徒行而東畊于海濱居數年果有
崔杼之難

晏子為莊公臣言大用每朝賜爵益邑俄而不用每朝
致邑與爵爵邑盡退朝而乘喟然而歎終而笑其僕曰

何歎笑相從數也晏子曰吾嘆也哀吾君不免于難吾笑也喜吾自得也吾亦無死矣崔杼果弑莊公晏子立崔杼之門從者曰死乎晏子曰獨吾君也乎哉吾死也曰行乎曰獨吾罪也乎哉吾亡也曰歸乎曰吾君死安歸君民者豈以陵民社稷是主臣君者豈為其口實社稷是養故君為社稷死則死之為社稷亡則亡之若君為已死而為已亡非其私暱孰能任之且人有君而弑之吾焉得死之而焉得亡之將庸何歸門啟而入崔子

曰子何不死子何不死晏子曰禍始吾不在也禍終吾不知也吾何為死且吾聞之以亡為行者不足以存君以死為義者不足以立功嬰豈其婢子也哉其縊而從之也遂袒免坐枕君尸而哭興三踊而出人謂崔子必殺之崔子曰民之望也舍之得民

崔杼既弑莊公而立景公杼與慶封相之劫諸將軍大夫及顯士庶人于太宮之坎上令無得不盟者為壇三仞堦其下以甲千列環其內外盟者皆脫劍而入維晏

子不肖崔杼許之有敢不盟者執拘其頸劍承其心令
自盟曰不與崔慶而與公室者受其不祥言不疾指不
至血者死所殺七人次及晏子晏子奉楮血仰天嘆曰
嗚呼崔子為無道而弑其君不與公室而與崔慶者受
此不祥俛而飲血崔杼謂晏子曰子變子言則齊國吾
與子共之子不變子言戟既在脰劍既在心維子圖之
也晏子曰刼吾以刃而失其志非勇也回吾以利而倍
其君非義也崔子子獨不為天討乎詩云莫莫葛藟施

于條枚愷悌君子求福不回今嬰且可以回而求福乎
曲刃鉤之直兵推之嬰不革矣崔杼將殺之或曰不可
子以子之君無道而殺之今其臣有道之士也又從而
殺之不可以為教矣崔子遂舍之晏子曰若大夫為大
不仁而為小仁焉有中乎趨出授綏而乘其僕將馳晏
子撫其手曰徐之疾不必生徐不必死鹿生于野命縣
于厨嬰命有繫矣按之成節而後去詩云彼已之子舍
命不渝晏子之謂也

景公使晏子為東阿宰三年毀聞于國景公不說召而免之晏子謝曰嬰知嬰之過矣請復治阿三年而譽必聞于國景公不忍復使治阿三年而譽聞于國景公說召而賞之景公問其故對曰昔者嬰之治阿也築蹊徑急門閭之政而淫民惡之舉儉力孝弟罰偷竄而惰民惡之決獄不避貴強惡之左右所求法則予非灋則否而左右惡之事貴人體不過禮而貴人惡之是以三邪毀乎外二讒毀于內三年而毀聞乎君也今臣謹更之

不築蹊徑而緩門閭之政而淫民說不舉儉力孝弟不
罰偷窳而惰民說決獄阿貴強而貴強說左右所求言
諾而左右說事貴人體過禮而貴人說是三邪譽乎外
二讒譽乎內三年而譽聞于君也昔者嬰之所以當誅
者宜賞今所以當賞者宜誅是故不敢受景公知晏子
賢迺任以國政三年而齊大興

景公與晏子立于曲潢之上晏子稱曰衣莫若新人莫
若故公曰衣之新也信善矣人之故相知情晏子歸負

載使人辭于公曰嬰故老耄無能也請毋服壯者之事
公自治國身弱於高國百姓大亂公恐復召晏子諸侯
忌其威而高國服其政田疇墾辟蠶桑蓀牧之處不足
絲蠶于燕牧馬于魯共貢入朝墨子聞之曰晏子知道
景公知窮矣

景公之時饑晏子請為民發粟公不許當為路寢之臺
晏子令吏重其賃遠其兆徐其日而不趨三年臺成而
民振故上悅乎游民足乎食君子曰政則晏子欲發粟

與民而已若使不可得則依物而偶于政

景公登東門防民單服然後上公曰此大傷牛馬蹄矣夫何不下六尺哉晏子對曰昔者吾先君桓公明君也而管仲賢相也夫以賢相佐明君而東門防全也古者不為殆有為也蚤歲溜水至入廣門即下六尺耳鄉者防下六尺則無齊矣夫古之重變古常此之謂也

景公遊于壽宮睹長年負薪者而有饑色公悲之喟然歎曰令吏養之晏子曰臣聞之樂賢而哀不肖守國之

本也今君愛老而恩無所不逮治國之本也公笑有喜色晏子曰聖王見賢以樂賢見不肖以哀不肖今請求老弱之不養鰥寡之無室者論而共秩焉公曰諾于是老弱有養鰥寡有室

景公探雀鵲鵲弱反之晏子聞之不待時而入見景公公汗出惕然晏子曰君何為者也公曰吾探雀鵲鵲弱故反之晏子逡巡北面再拜而賀曰吾君有聖王之道矣公曰寡人探雀鵲鵲弱故反之其當聖王之道者何

也晏子對曰君探雀穀穀弱反之是長幼也吾君仁愛
曾禽獸之加焉而況于人乎此聖王之道也

景公睹嬰兒有乞于塗者公曰是無歸夫晏子對曰君
存何為無歸使吏養之可立而以聞

景公正晝被髮乘六馬御婦人以出正閨則跪擊其馬
而反之曰爾非吾君也公慙而不朝晏子睹裔歛而問
曰君何故不朝對曰昔者君正晝被髮乘六馬御婦人
以出正閨則跪擊其馬而反之曰爾非吾君也公慙而

出反不果是以不朝晏子入見景公曰昔者寡人有罪被髮乘六馬以出正閨則跪擊馬而反之曰爾非吾君也寡人以天子大夫之賜得率百姓以守宗廟今見戮于則跪以辱社稷吾猶可以齊于諸侯乎晏子對曰君勿惡焉臣聞下無直辭上有隱君民多諱言君有驕行古者明君在上下多直辭君上好善民無諱言今君有失行則跪直辭禁之是君之福也故臣來慶請賞之以明君之好善禮之以明君之受諫公笑曰可乎晏子曰

可于是令別跪倍資無征時朝無事也

景公飲酒夜移于晏子前駢欵門曰君至晏子被玄端立于門曰諸侯得微有故乎國家得微有事乎君何為非時而夜辱公曰酒醴之味金石之聲願與夫子樂之晏子對曰夫布薦席陳簠簋者有人臣不敢與焉公曰移于司馬穰苴之家前驅欵門曰君至穰苴介冑操戟立于門曰諸侯得微有兵乎大臣得微有叛者乎君何為非時而夜辱公曰酒醴之味金石之聲願與將軍樂

之穰苴對曰夫布薦席陳簠簋者有人臣不敢與焉公
曰移于梁丘據之家前驅款門曰君至梁丘據左操瑟
右挈竽行歌而出公曰樂哉今夕吾飲也微彼二子者
何以治吾國微此一臣者何以樂吾身君子曰聖賢之
君皆有益友無偷樂之臣景公弗能及故兩用之僅得
不亡

晏子侍于景公朝寒公曰請進暖食晏子對曰嬰非君
奉餽之臣也敢辭公曰請進服裘對曰嬰非君茵席之

臣也敢辭公曰然夫子之于寡人何為者也對曰嬰社稷之臣也公曰何謂社稷之臣對曰夫社稷之臣能立社稷別上下之義使當其理制百官之序使得其宜作為辭令可分布于四方自是之後君不以禮不見晏子晏子飲景公酒令器必新家老曰財不足請斂于氓晏子曰止夫樂者上下同之故天子與天下諸侯與境內大夫以下各與其僚無有獨樂今上樂其樂下傷其費是獨樂音也不可

晏子飲景公酒日暮公呼具火晏子辭曰詩云側弁之
俄言失德也屢舞傴僂言失容也既醉以酒既飽以德
既醉而出並受其福賓主之禮也醉而不出是謂伐德
賓之罪也嬰以卜其日未卜其夜公曰善舉酒祭之再
拜而出曰豈過我哉吾託國于晏子也以其家貨養寡
人不欲其淫侈也而況與寡人謀國乎

晉平公欲伐齊使范昭往觀焉景公觴之飲酒酣范昭曰
請君之棄樽公曰酌寡人之樽進之于客范昭已飲晏子

曰徹樽更之罇觶具矣范昭佯醉不悅而起舞謂太師曰能為我調成周之樂乎吾為子舞之太師曰冥臣不習范昭趨而出景公謂晏子曰晉大國也使人來將觀吾政今子怒大國之使者將奈何晏子曰夫范昭之為人也非陋而不知禮也且欲試吾君臣故絕之也景公謂太師曰子何以不為客調成周之樂乎太師對曰夫成周之樂天子之樂也為客調成周之樂乎太師對曰夫成周之樂天子之樂也調之必人主舞之今范昭人臣欲舞天子之樂臣故不為也范昭歸以報平公曰齊未可伐也臣欲試其君而晏子

識之臣欲犯其禮而太師知之仲尼聞曰夫不出于尊
俎之間而知千里之外其晏子之謂也可謂折衝矣而
太師其與焉

景公伐魯傳許得東門無澤公問焉魯之年穀何如對
陰水厥陽冰厚五寸不知以告晏子晏子對曰君子也
問年穀而對以冰禮也陰水厥陽冰厚五寸者寒溫節
節則刑政平平則上下和和則年穀熟年充衆和而伐
之臣恐罷民弊兵不成君之意請禮魯以息吾怨遣其

執以明吾德公曰善廼不伐魯

景公予魯君地山陰數百社使晏子致之魯使子叔昭
伯受地不盡受也晏子曰寡君獻地忠廉也曷為不盡
受了叔昭伯曰臣受命于君曰諸侯相見交讓爭處其
卑禮之文也交委多爭受少行之實也禮成文于前行
成章于後交之所以長久也且吾聞君子不盡人之歡
不竭人之忠吾是以不盡受也晏子歸報公公喜笑曰
魯君猶若是乎晏子曰臣聞大國貪于名小國貪于實

此諸侯之公患也。今魯處卑而不貪乎尊，辭實而不貪乎多，行廉不為苟得，道義不為苟合，不盡人之歡，不竭人之忠，以全其交，君之道義殊于世俗，國免于患。公曰：寡人說魯君，故予之地。今行果若此，吾將使人賀之。晏子曰：不君以驩予之地，而賀其辭，則交不親而地不為德矣。公曰：善。于是重魯之幣，母比諸侯厚其禮，母比賓客君子于魯，而後明行廉辭地之可為重名也。公遊于紀，得金壺，發視之中有丹書曰：食魚無反勿乘。

駑馬公曰善哉知苦言食魚無反則惡其鰓也勿乘駑馬惡其取道不遠也晏子對曰不然食魚無反毋盡民力乎勿乘駑馬則無置不肖于側乎公曰紀有書何以亡也晏子對曰有以亡也嬰聞之君子有道懸之閭紀有此言注之壺不亡何待乎

魯昭公棄國走齊齊公問焉曰君何年之少而棄國之蚤奚道至于此乎昭公對曰吾少之時人多愛我者吾體不能親人多諫我者吾志不能用是則內無拂而外

無輔輔拂無一人諂諛我者甚衆譬之猶秋蓬也孤其
根而美枝葉秋風一至根且拔矣景公辯其言以語晏
子曰使是人反其國豈不為古之賢君乎晏子對曰不
然夫愚者多悔不肖者自賢溺者不問墜迷者不問路
溺而後問墜迷而後問路譬之猶臨難而遽鑄兵噎而
遽掘井雖速亦無及已

晏子使魯仲尼命門弟子往觀子貢反報曰孰謂晏子
習于禮乎夫禮曰登階不歷堂上不趨授玉不跪今晏

子皆反此孰謂晏子習于禮者晏子既已有事于魯君
退見仲尼仲尼曰夫禮登階不歷堂上不趨授玉不跪
天子反此乎晏子曰嬰聞兩楹之間君臣有位焉君行
其一臣行其二君之來邀是以登階歷堂上趨以反位
也君授玉卑故跪以下之且吾聞之大者不踰閑小者
出入可也晏子出仲尼送之以賓客之禮不計之義維
晏子為能行之

晏子之魯朝食進餽膳有豚焉晏子曰去其二肩畫者

進膳則豚肩不具侍者曰膳豚肩亡晏子曰釋之矣侍者曰我能得其人晏子曰止吾聞之量功而不量力則民盡藏餘不分則民盜子教我所以改之無教我求其人也

曾子將行晏子送之曰君子贈人以軒不者以言吾請以言乎以軒乎曾子曰請以言晏子曰今夫車輪山之直木也良匠揉之其圓中規雖有槁暴不復贏矣故君子慎隱揉和氏之璧井里之困也良工修之則為存國

之寶故君子慎所修今夫蘭本三年而成湛之苦酒則君子不近庶人不佩湛之麋醢而賈匹馬矣非蘭本美也所蕩然也願子之必求所湛嬰聞之君子居必擇居游必就士擇居所以求士求士所以辟患也嬰聞汨常移質習俗移性不可不慎也

晏子之晉平中年睹弊冠及裘負芻息于塗側者以為君子也使人問焉曰子何為者也對曰我越石父者也晏子曰何為至此曰吾為人臣僕于中年見使將歸晏

子曰何為之僕對曰不免凍餓之切吾身是以為僕也
晏子曰為僕幾何對曰三年矣晏子曰可得贖乎對曰
可遂解左驂以贈之因載而與之俱歸至舍不辭而入
越石父怒而請絕晏子使人應之曰吾未嘗得交夫子
也子為僕三年吾迺今日睹而贖之吾于子尚未可乎
子何絕我之暴也越石父對之曰臣聞之士者詘乎不
知己而申乎知己故君子不以功輕人之身不為彼功
詘身之理吾三年為人臣僕而莫吾知也今子贖我吾

以子為知我矣嚮者子乘不我辭也吾以子為忘今又不辭而入是與臣我者同矣我猶且為臣請鬻于世晏子出見之曰嚮者見客之容而今也見客之意嬰聞之省行者不引其過察實者不譏其辭嬰可以辭而無棄乎嬰誠革之廼令糞灑改席尊醺而禮之越石父曰吾聞之至恭不修途尊禮不受擯夫子禮之僕不敢當也晏子遂以為上客君子曰俗人之有功則德德則驕晏子有功免人于厄而反詘下之其去俗亦遠矣此全功

之道也

晏子為齊相出其御之妻從門間而闚其夫為相御擁大蓋策駟馬意氣揚揚甚自得也既而歸其妻請去夫問其故妻曰晏子長不滿六尺身相齊國名顯諸侯今者妾觀其出志念深矣常有以自下者今子長八尺廼為人僕御然子之意自以為足妾是以求去也其後夫自抑損晏子恠而問之御以實對晏子薦以為大夫燕之游士有泯子午者南見晏子于齊言有文章術有

條理巨可以補國細可以益晏子者三百篇睹晏子恐
慎而不能言晏子假之以悲色開之以禮顏然後能盡
其復也客退晏子直席而坐廢朝移晷在側者曰嚮者
燕客侍夫子胡為憂也晏子曰燕萬乘之國也齊千里
之塗也泯子午以萬乘之國為不足說以千里之塗為
不足遠則是千萬人之上也且猶不能殫其言于我況
乎齊人之懷善而死者乎吾所以不得睹者豈不多矣
然吾失此何之有也

齊有北郭騷者結果罔捆蒲葦織履以養其母猶不足
踵門見晏子曰竊說先生之義願乞所以養母者晏子
使人分倉粟府金而遺之辭金受粟有間晏子見疑于
景公出犇過北郭騷之門而辭北郭騷沐浴而見晏子
曰夫子將焉適晏子曰見疑于齊君將出犇北郭騷曰
夫子勉之矣晏子上車太息而歎曰嬰之亡豈不宜哉
亦不知士甚矣晏子行北郭子召其友而告之曰吾說
晏子之義而嘗乞所以養母者焉吾聞之養其親者身

仇其難今晏子見疑吾將以身死白之著衣冠令其友
操劍奉而從造于君庭求復者曰晏子天下之賢者也
今去齊國齊必侵矣方見國之必侵不若死請以頭託
白晏子也因謂其友曰盛吾頭于笥中奉以託退而自
刎其友因奉託而謂復者曰此北郭子為國故死吾將
為北郭子死又退而自刎景公聞之大駭乘駟而自追
晏子及之國郊請而反之晏子不得已而反聞北郭子
之以死白已也太息而歎曰嬰之亡豈不宜哉亦愈不

知士甚矣

景公謂晏子曰吾聞高糾與夫子遊寡人請見之晏子對曰臣聞之為地戰者不能成其王為祿仕者不能正其君高糾與嬰為兄弟久矣未嘗干嬰之行特祿仕之臣也何足以補君乎

高糾事晏子而見逐高糾曰臣事夫子三年無得而卒見逐其說何也晏子曰嬰之家俗有三而子無一焉糾曰可得聞乎晏子曰嬰之家俗間處從容不談議則疏

出不相揚美入不相削行則不與通國事無論驕士慢
知者則不朝也此三者嬰之家俗今子是無一焉故嬰
非特食餽之長也是以辭

晏子春秋卷五

晏子春秋卷六

內篇

雜下第六

靈公好婦人而丈夫飾者國人盡服之公使吏禁之曰
女子而男子飾者裂其衣斷其帶裂衣斷帶相望而不
止晏子見公問曰寡人使吏禁女子而男子飾裂斷其
衣帶相望而不止者何也晏子對曰君使服之于內而

禁之于外猶懸牛首于門而賣馬肉于內也公何以不
使內勿服則外莫敢為也公曰善使內勿服踰月而國
莫之服

齊人甚好穀擊相犯以為樂禁之不止晏子患之廼為
新車良馬出與人相犯也曰穀擊者不祥臣其祭祀不
順居處不敬乎下車而棄去之然後國人乃不為故曰
禁之以制而身不先行民不能止故化其心莫若教也
景公畋于梧丘夜猶早公姑坐睡而夢有五丈夫北面

韋廬稱無罪焉公覺召晏子而告其所夢公曰我其嘗
殺不辜誅無罪耶晏子對曰昔者先君靈公畋五丈夫
罟而駭獸故殺之斷其頭而葬之命曰五丈夫之丘此
其地耶公令人掘而求之則五頭同穴而存焉公曰嘻
令吏葬之國人不知其曹也曰君憫白骨而況于生者
乎不遺餘力矣不釋餘知矣故曰君子之為善易矣

景公為路寢之臺成而不踊焉栢常騫曰君為臺甚急
臺成君何為而不踊焉公曰然有梟昔者鳴聲無不為

也吾惡之甚是以不踊焉栢常騫曰臣請讓而去公曰
何具對曰築新室為置白茅公使為室成置白茅焉栢
常騫夜用事明日問公曰今昔聞鵲聲乎公曰一鳴而
不復聞使人往視之鵲當陞布翌伏地而死公曰子之
道若此其明亦能益寡人之壽乎對曰能公曰能益幾
何對曰天子九諸侯七大夫五公曰子亦有徵兆之見
乎對曰得壽地且動公喜令百官趣具騫之所求栢常
騫出遭晏子于塗拜馬前騫辭曰為讓君鵲而殺之君

謂騫曰子之道若此其明也亦能益寡人壽乎騫曰能
今且大祭為君請壽故將往以聞晏子曰嘻亦善能為
君請壽也雖然吾聞之維以政與德而順乎神為可以
益壽今徒祭可以益壽乎然則福兆有見乎對曰得壽
地將動晏子曰騫昔吾見維星絕樞星散地其動汝以
是乎栢常騫俯有間抑而對曰然晏子曰為之無益不
為無損也汝薄歛毋費民且無令君知之

景公新成栢寢之室使師開鼓琴師開左撫宮右彈商

曰室夕公曰何以知之師開對曰東方之聲薄西方之聲揚公召大匠曰室何為夕大匠曰立室以宮矩為之于是召司空曰立宮何為夕司空曰立宮以城矩為之明日晏子朝公公曰先君太公以營丘之封立城曷為夕晏子對曰古之立國者南望南斗北戴樞星彼安有朝夕哉然而以今之夕者周之建國國之西方以尊周也公蹙然曰古之臣乎

景公病水卧十數日夜魯與二日闕不勝晏子朝公曰

夕者夢與二日鬪而寡人不勝我其死乎晏子對曰請
召占夢者出于閨使人以車迎占夢者至曰曷為見召
晏子曰夜者公夢二日與公鬪不勝公曰寡人死乎故
請君占夢是所為也占夢者曰請反具書晏子曰毋反
書公所病者陰也日者陽也一陰不勝二陽故病將已
以是對占夢者入公曰寡人夢與二日鬪而不勝寡人
死乎占夢者對曰公之所病陰也日者陽也一陰不勝
二陽公病將已居三日公病大愈公且賜占夢者占夢

者曰此非臣之力晏子教臣也公召晏子且賜之晏子
曰占夢以臣之言對故有益也使臣言之則不信矣此
占夢之力也臣無功焉之能

景公病疽在背高子國子請公曰職當撫瘍高子進而
撫瘍公曰熱乎曰熱熱何如曰如火其色何如曰如未
熟李大小何如曰如豆墮者何如曰如履辨二子者出
晏子請見公曰寡人有病不能勝衣冠以出見夫子夫
子其辱視寡人乎晏子入呼宰人具盥御者具巾刷手

溫之發席傳薦跪請撫瘍公曰其熱何如曰如日其色何如曰如蒼玉大小何如曰如璧其墮者何如曰如珪晏子出公曰吾不見君子不知野人之拙也

晏子使吳吳王謂行人曰吾聞晏嬰蓋北方辯于辭習于禮者也命儻者曰客見則稱天子請見明日晏子有事行人曰天子請見晏子蹇然行人又曰天子請見晏子蹇然又曰天子請見晏子蹇然者三曰臣受命弊邑之君將使於吳王之所以不敏而迷惑入于天子之朝

敢問吳王惡乎存然後吳王曰夫差請見見之以諸侯之禮

晏子使楚以晏子短楚人為小門于大門之側而延晏子晏子不入曰使狗國者從狗門入今臣使楚不當從此門入儻者更道從大門入見楚王王曰齊無人耶晏子對曰臨淄三百閭張袂成陰揮汗成雨比肩繼踵而在何為無人王曰然則子何為使乎晏子對曰齊命使各有所主其賢者使使賢王不肖者使使不肖王嬰最

不肖故直使楚矣

晏子將至楚楚聞之謂左右曰晏嬰齊之習辭者也今方來吾欲辱之何以也左右對曰為其來也臣請縛一人過王而行王曰何為者也對曰齊人也王曰何坐曰坐盜晏子至楚王賜晏子酒酒酣吏二縛一人詣王王曰縛者曷為者也對曰齊人也坐盜王視晏子曰齊人固善盜乎晏子避席對曰嬰聞之橘生淮南則為橘生于淮北則為枳葉徒相似其實味不同所以然者何水

土異也。今民生長于齊，不盜入楚，則盜得無楚之水土，使民善盜耶？王笑曰：「聖人非所與嬉也。寡人反取病焉。」景公使晏子于楚。楚王進橘，置削。晏子不剖而並食之。楚王曰：「當去剖。」晏子對曰：「臣聞之，賜人主前者，瓜桃不削，橘柚不剖。今者萬乘無教，令臣故不敢剖。不然，臣非不知也。」

景公飲酒，田桓子侍望見晏子而復于公曰：「請浮晏子。」公曰：「何故也？」無宇對曰：「晏子衣緇布之衣，麋鹿之裘，棧。」

軫之車而駕駑馬以朝是隱君之賜也公曰諾晏子坐酌者奉觴進之曰君命浮子晏子曰何故也田桓子曰君賜之卿位以尊其身寵之百萬以富其家羣臣其爵莫尊于子祿莫重于子今子衣緇布之衣麋鹿之裘棧軫之車而駕駑馬以朝是則隱君之賜也故浮子晏子避席曰請飲而後辭乎其辭而後飲乎公曰辭然後飲晏子曰君之賜卿位以尊其身嬰非敢為顯受也為行君令也寵以百萬以富其家嬰非敢為富受也為通君

賜也臣聞古之賢君有受厚賜而不顧其困族則過之
臨事守職不勝其任則過之君之內隸臣之父兄若有
離散在于野鄙此臣之罪也君之內隸臣之所職若有
播之在于四方此臣之罪也兵革之不完戰車之不修
此臣之罪也若夫弊車駑馬以朝意者非臣之罪乎且
臣以君之賜父之黨無不乘車者母之黨無不足于衣
食者妻之黨無凍餒者國之間士待臣而後舉火者數
百家如此者為彰君賜乎為隱君賜乎公曰善為我浮

無宇也

田桓子見晏子獨立于墻陰曰子何為獨立而不憂何
不求四鄉之學士可者而與坐晏子曰其言似君子出
言而非也嬰惡得學士之可者而與之坐且君子之難
得也若美山然名山既多矣松柏既茂矣望之相相然
盡目力不知厭而世有所美焉固欲登彼相相之上乞
乞然不知厭小人者與此異若部婁之未登善登之無
蹊維有楚棘而已遠望無見也俛就則傷嬰惡能無獨

立焉且人何憂靜處遠慮見歲若月學問不厭不知老之將至安用從酒田桓子曰何謂從酒晏子曰無客而飲謂之從酒今若子者晝夜守尊謂之從酒也

欒氏高氏欲逐田氏鮑氏田氏鮑氏先知而遂攻之高彊曰先得君田鮑安往遂攻虎門二家召晏子晏子無所從也從者曰何為不助田鮑晏子曰何善焉其助之也何為不助欒高曰庸愈于彼乎門開公召而入欒高不勝而出田桓子欲分其家以告晏子晏子曰不可君

不能飭法而羣臣專制亂之本也今又欲分其家利其
貨是非制也子必致之公且嬰聞之禁者政之本也讓
者德之主也樂高不讓以至此禍可毋慎乎廉之謂公
正讓之謂保德凡有血氣者皆有爭心然利生孽維義
可以為長存且分爭者不勝其禍辭讓者不失其福子
必勿取桓子曰善盡致之公而請老于劇

慶氏亡分其邑與晏子叩殿其鄙六十晏子弗受子尾
曰富者人之所欲也何獨弗欲晏子對曰慶氏之邑足

欲故亡吾邑不足欲也益之以卽殿廼足欲足欲亡無日矣在外不得宰吾一邑不受卽殿非惡富也恐失富也且夫富如布帛之有幅焉為之制度使無遷也夫生厚而用利于是乎正德以幅之使無黜慢謂之幅利利過則為敗吾不敢貪多所謂幅也

景公祿晏子以平陰與橐邑反市者十一社晏子辭曰吾君好治宮室民之力弊矣又好盤游翫好以飭女子民之財竭矣又好興師民之死近矣弊其力竭其財近

其死下之疾其上甚矣此嬰之所為不敢受也公曰是則可矣雖然君子獨不欲富與貴乎晏子曰嬰聞為人臣者先君後身安國而度家宗君而處身曷為獨不欲富與貴也公曰然則曷以祿夫子晏子對曰君商漁鹽關市譏而不征耕者十取一焉弛刑罰若死者刑若刑者罰若罰者免若此三言者嬰之祿君之利也公曰此三言者寡人無事焉請以從夫子公既行若三言使人問大國大國之君曰齊安矣使人問小國小國之君曰

齊不我加矣

晏子相齊三年政平民說梁丘據見晏子中食而肉不足以告景公旦日割地將封晏子晏子辭不受曰富而不驕者未嘗聞之貧而不恨者嬰是也所以貧而不恨者以善為師也今封易嬰之師師已輕封已重矣請辭晏子方食景公使使者至分食食之使者不飽晏子亦不飽使者反言之公公曰嘻晏子之家若是其貧也寡人不知是寡人之過也使吏致千金與市租請以奉賓

客晏子辭三致之終再拜而辭曰嬰之家不貧以君之
賜澤覆三族延及交遊以振百姓君之賜也厚矣嬰之
家不貧也嬰聞之夫厚取之君而施之民是臣代君君
民也忠臣不為也厚取之君而不施于民是為筐篋之
藏也仁人不為也進取于君退得罪于士身死而財遷
于它人是為宰藏也智者不為也夫十總之布一豆之
食足于中免矣景公謂晏子曰昔吾先君桓公以書社
五百封管仲不辭而受子辭之何也晏子曰嬰聞之聖

人千慮必有一失愚人千慮必有一得意者管仲之失而嬰之得者耶故再拜而不敢受命

晏子相齊衣十升之布脫粟之食五卵苔菜而已左右以告公公為之封邑使田無宇致臺與無鹽晏子對曰昔吾先君太公受之營丘為地五百里為世國長自太公至于公之身有數十公矣苟能說其君以取邑不至公之身趣齊搏以求升土不得容足而寓焉嬰聞之臣有德益祿無德退祿惡有不肖父為不肖子為封邑以

敗其君之政者乎遂不受

景公賜晏子邑晏子辭田桓子謂晏子曰君歡然與子
邑必不受以恨君何也晏子對曰嬰聞之節受于上者
寵長于君儉居處者名廣于外夫長寵廣名君子之事
也嬰獨庸能已乎

景公欲更晏子之宅曰子之宅近市湫隘囂塵不可以
居請更諸爽塏者晏子辭曰君之先臣容焉臣不足以
嗣之于臣侈矣且小人近市朝夕得所求小人之利也

敢煩里旅公笑曰子近市識貴賤乎對曰既竊利之敢
不識乎公曰何貴何賤是時也公繫于刑有鬻踊者故
對曰踊貴而屨賤公愀然改容公為是省于刑君子曰
仁人之言其利溥哉晏子一言而齊侯省刑詩曰君子
如祉亂庶遄已其是之謂乎

晏子使晉景公更其宅反則成矣既拜廼毀之而為里
室皆如其舊則使宅人反之且諺曰非宅是卜維隣是
卜二三子先卜隣矣違卜不祥君子不犯非禮小人不

犯不祥古之制也吾敢違諸乎卒復其舊宅公弗許因陳桓子以請廼許之

景公謂晏子曰寡人欲朝夕見為夫子築室于閨內可乎晏子對曰臣聞之隱而顯近而結維至賢耳如臣者飾其容止以待承令猶恐罪戾也今君近之是遠之也請辭

景公有愛女請嫁于晏子公廼往燕晏子之家飲酒酣公見其妻曰此子之內子耶晏子對曰然是也公曰嘻

亦老且惡矣寡人有女少且姣請以滿夫子之宮晏子
違席而對曰乃此則老且惡嬰與之居故矣故及其少
而姣也且人固以壯託乎老姣託乎惡彼嘗託而嬰受
之矣君雖有賜可以使嬰倍其託乎再拜而辭

晏子朝乘弊車駕駑馬景公見之曰嘻夫子之祿寡耶
何乘不任之甚也晏子對曰賴君之賜得以壽三族及
國游士皆得生焉臣得暖衣飽食弊車駑馬以奉其身
于臣足矣晏子出公使梁丘據遺之輅車乘馬三返不

受公不悅趣召晏子晏子至公曰夫子不受寡人亦不
乘晏子對曰君使臣臨百官之吏臣節其衣服飲食之
養以先國之民然猶恐其侈靡而不顧其行也今輅車
乘馬君乘之上而臣亦乘之下即之無義侈其衣服飲
食而不顧其行者臣無以禁之遂讓不受

晏子相景公食脫粟之食炙三弋五卵苔菜耳矣公聞
之往燕焉睹晏子之食也公曰嘻夫子之家如此其貧
乎而寡人不知寡人之罪也晏子對曰以世之不足也

免粟之食飽士之一乞也炙三弋士之二乞也五卯士之三乞也嬰無倍人之行而有參士之食君之賜厚矣嬰之家不貧再拜而謝

梁丘據謂晏子曰吾至死不及夫子矣晏子曰嬰聞之為者常成行者常至嬰非有異于人也常為而不置常行而不休者故難及也

晏子相景公老辭邑公曰自吾先君定公至今用世多矣齊大夫未有老辭邑者矣今夫子獨辭之是毀國之

故棄寡人也不可晏子對曰嬰聞古之事君者稱身而食德厚而受祿德薄則辭祿德厚受祿所以明上也德薄辭祿可以潔下也嬰老薄無能而厚受祿是掩上之明污下之行不可公不許曰昔吾先君桓公有管仲恤勞齊國身老賞之以三歸澤及子孫今夫子亦相寡人欲為夫子三歸澤至子孫豈不可哉對曰昔者管子事桓公桓公義高諸侯德備百姓今嬰事君也國僅齊于諸侯怨積乎百姓嬰之罪多矣而君欲賞之豈以其不

肖父為不肖子厚受賞以傷國民義哉且夫德薄而祿厚智昏而家富是彰污而逆教也不可公不許晏子出異日朝得間而入邑致車一乘而後止

晏子病將死其妻曰夫子無欲言乎子曰吾恐死而俗變謹視爾家毋變爾俗也

晏子病將死鑿楹納書焉謂其妻曰楹語也子壯而示之及壯發書之言曰布帛不可窮窮不可飾牛馬不可窮窮不可服士不可窮窮不可任國不可窮窮不可竊

也

晏子春秋卷六

晏子春秋卷七

外篇上

景公飲酒數日而樂釋衣冠自鼓缶謂左右曰仁人亦樂是夫梁丘據對曰仁人之耳目亦猶人也夫奚為獨不樂此也公曰趣駕迎晏子晏子朝以至受觴再拜公曰寡人甚樂此樂欲與夫子共之請去禮晏子對曰君之言過矣羣臣皆欲去禮以事君嬰恐君子之不欲也

今齊國五尺之童子力皆過嬰又能勝君然而不敢亂者畏禮義也上若無禮無以使其下下若無禮無以事其上夫麋鹿維無禮故父子同麋人之所以貴于禽獸者以有禮也嬰聞之人君無禮無以臨其邦大夫無禮官吏不恭父子無禮其家必凶兄弟無禮不能久同詩曰人而無禮胡不遄死故禮不可去也公曰寡人不敏無良左右淫盪寡人以至于此請殺之晏子曰左右何罪君若無禮則好禮者去無禮者至君若好禮則有禮

者至無禮者去公曰善請易衣革冠更受命晏子避走
立乎門外公令人糞灑改席召衣冠以迎晏子晏子入
門三讓升階用三獻焉噉酒嘗膳再拜告饜而出公下
拜送之門反命撒酒去樂曰吾以彰晏子之教也

景公疥逐疔期而不瘳諸侯之賓問疾者多在梁丘據
裔欸言于公曰吾事鬼神豐于先君有加矣今君疾病
為諸侯憂是祝史之罪也諸侯不知其謂我不敬君盍
誅于祝固史嚚以辭賓公說告晏子晏子對曰日宋之

盟屈建問范會之惠于趙武趙武曰夫子家事治言于
晉國竭情無私其祝史祭祀陳信不愧其家事無猜其
祝史不祈建以語康王康王曰神人無怨宜夫子之光
輔五君以為諸主也公曰據與欵謂寡人能事鬼神故
欲誅于祝史子稱是語何故對曰若有德之君外內不
廢上下無怨動無違事其祝史薦信無愧心矣是以鬼
神用饗國受其福祝史與焉其所以蕃祉老壽者為信
君使也其言忠信于鬼神其適遇淫君外內頗邪上下

然動作辟從欲私高臺深池撞鐘舞女斬刈民

力輸其粟以成其志不恤民命縱肆行非度

無所還忌不思謗譏不憚鬼神怒民庸無悛于心其

祝史薦信是言罪也其蓋失數美是矯誣也進退無辭

則虛以求媚是以鬼神不饗其國以禍之祝史與焉所

以大昏孤疾者為暴君使也其言僭慢于鬼神公曰然

則若之何對曰不可為也山林之木衡鹿守之澤之萑

蒲舟鮫守之數之薪蒸虞候守之海之鹽蜃祈望守之

縣鄙之人入從其政偪介之關暴征其私承嗣大夫彊
易其賄布常無藝徵歛無度宮室日更淫樂不違內寵
之妾肆奪于市外寵之臣僭令于鄙私欲養求不給則
應民人苦病夫婦皆詛祝有益也詛亦有損聊攝以東
姑尤以西其為人也多矣雖其善祝豈能勝億兆人之
詛君若欲誅于祝史修德而後可公說使有司寬政毀
關去禁薄歛已責公疾愈

景公飲酒樂公曰古而無死其樂若何晏子對曰古而

無死則古之樂也君何得焉昔爽鳩氏始居此地季荊因之有逢伯陵因之蒲姑氏因之而後太公因之古若無死爽鳩氏之樂非君所願也

景公至自畋晏子侍于遼臺梁丘據造焉公曰維據與我和夫晏子對曰據亦同也焉得為和公曰和與同異乎對曰異和如羹焉水火醯醢鹽梅以烹魚肉燂之以新宰夫和之齊之以味濟其不及以洩其過君子食之以平其心君臣亦然君所謂可而有否焉臣獻其否以

成其可君所謂否而有可焉臣獻其可以去其否是以
政平而不干民無爭心故詩曰亦有和羹既戒且平奏
駸無言時靡有爭先王之濟五味和五聲也以平其心
成其政也聲亦如味一氣二體三類四物五聲六律七
音八風九歌以相成也清濁小大短長疾徐哀樂剛柔
遲速高下出入周流以相濟也君子聽之以平其心心
平德和故詩曰惠音不瑕今據不然君所謂可據亦曰
可君所謂否據亦曰否若以水濟水誰能食之若琴瑟

之專一誰能聽之同之不可也如是公曰善

齊有彗星景公使祝禳之晏子諫曰無益也祇取誣焉
天道不諂不貳其命若之何禳之也且天之有彗以除
穢也君無穢德又何禳焉若惠之穢禳之何損詩云維
此文王小心翼翼昭事上帝聿懷多福厥德不回以受
方國君無違惠方國將至何患于彗詩曰我無所監夏
后及商用亂之故民卒汙亡若德之回亂民將汙亡祝
史之為無能補也公說乃止

景公賞賜及後宮文繡被臺榭菽粟食鳧鴈出而見殓
謂晏子曰此何為而死晏子對曰此餒而死公曰嘻寡
人之無德也甚矣對曰君之德著而彰何為無德也景
公曰何謂也對曰君之德及後宮與臺榭君之玩物衣
以文繡君之鳧鴈食以菽粟君之營內自樂延及後宮
之族何為其無德顧臣願有請于君由君之意自樂之
心推而與百姓同之則何殓之有君不推此而苟營內
好私使財貨衝有所聚菽粟幣帛腐于困府惠不遍加

于百姓公心不周乎萬國則桀紂之所以亡也夫士民之所以叛由偏之也君如察臣嬰之言推君之盛德公布之于天下則湯武可為也一殪何足恤哉

景公好弋使燭鄒主鳥而亡之公怒詔吏殺之晏子曰燭鄒有罪三請數之以其罪而殺之公曰可于是召而數之公前曰燭鄒汝為吾君主鳥而亡之是罪一也使吾君以鳥之故殺人是罪二也使諸侯聞之以吾君重鳥以輕士是罪三也數燭鄒罪已畢請殺之公曰勿殺

寡人聞命矣

景公登筲室而望見人有斷雍門之櫺者公令吏拘之
顧謂晏子趣誅之晏子默然不對公曰雍門之櫺寡人
所甚愛也此見斷之故使夫子誅之默然而不應何也
晏子對曰嬰聞之古者人君出則闢道十里非畏也冕
前有旒惡多所見也纁紘琫耳惡多所聞也大帶重半
鈞爲履倍重不欲輕也刑死之罪日中之朝君過之則
赦之嬰未嘗聞爲人君而自坐其民者也公曰赦之無

使夫子復言

景公築長庖之臺晏子侍坐觴三行晏子起舞曰歲已暮矣而禾不穫忽忽矣若之何歲已寒矣而役不罷憊憊矣如之何舞三而涕下沾襟景公慙焉為之罷長庖之役

景公與晏子立曲潢之上望見齊國問晏子曰後世孰將踐有齊國者乎晏子對曰非賤臣之所敢議也公曰胡必然也得者無失則虞夏常存矣晏子對曰臣聞見

不足以知之者智也先言而後當者惠也夫智與惠君子之事臣奚足以知之乎雖然臣請陳其為政君彊臣弱政之本也君唱臣和教之隆也刑罰在君民之紀也今夫田無宇二世有功于國而利取分寡公室兼之國權專之君臣易施能無衰乎嬰聞之臣富主亡由是觀之其無宇之後無幾齊國田氏之國也嬰老不能待公之事公若即世政不在公室公曰然則奈何晏子對曰維禮可以已之其在禮也家施不及國民不懈貨不移

工賈不變士不濫官不諂大夫不收公利公曰善今知禮之可以為國也對曰禮之可以為國也久矣與天地並立君令臣忠父慈子孝兄愛弟敬夫和妻柔姑慈婦聽禮之經也君令而不違臣忠而不二父慈而教子孝而箴兄愛而友弟敬而順夫和而義妻柔而貞姑慈而從婦聽而婉禮之質也公曰善哉寡人迺今知禮之尚也晏子曰夫禮先王之所以臨天下也以為其民是故尚之

景公宿于路寢之宮夜分聞西方有男子哭者公悲之
明日朝問于晏子曰寡人夜者聞西方有男子哭者聲
甚哀氣甚悲是奚為者也寡人哀之晏子對曰西郭徒
居布衣之士盆成适也父之孝子兄之順弟也又嘗為
孔子門人今其母不幸而死祔柩未葬家貧身老子孺
恐力不能合祔是以悲也公曰子為寡人吊之因問其
偏祔何所在晏子奉命往吊而問偏之所在盆成适再
拜稽首而不起曰偏祔寄于路寢得為地下之臣擁札

摻筆給事宮殿中右陛之下願以某日送未得君之意也窮困無以圖之布唇枯舌焦心熱中今君不辱而臨之願君圖之晏子曰然此人之甚重者也而恐君不許也盆成适屢然曰凡在君耳且臣聞之越王好勇其民輕死楚靈王好細腰其朝多餓死人子胥忠其君故天下皆願得以為子今為人子臣而離散其親戚孝乎哉足以為臣乎若此而得祔是生臣而安死母也若此而不得則臣請輓尸車而寄之于國門外宇溜之下身不

敢飲食擁轅執輅木乾鳥栖袒肉暴骸以望君愍之賤
臣雖愚竊意明君哀而不忍也晏子入復乎公公忿然
作色而怒曰子何必患若言而教寡人乎晏子對曰嬰
聞之忠不避危愛無惡言且嬰固以難之矣今君營處
為游觀既奪人有又禁其葬非仁也肆心傲聽不恤民
憂非義也若何勿聽因道盆成适之辭公喟然太息曰
悲乎悲乎勿復言迺使男子袒免女子髮笄者以百數
為開宮門以迎盆成适适脫衰經冠條纓墨緣以見乎

公公曰吾聞之五子不滿隅一子可滿朝非廼子耶盆
成适于是臨事不敢哭奉事以禮畢出門然後舉聲焉
景公問晏子曰治國之患亦有常乎對曰佞人讒夫之
在君側者好惡良臣而行與小人此國之長患也公曰
讒佞之人則誠不善矣雖然則奚曾為國常患乎晏子
曰君以為耳目而好繆事則是君之耳目繆也夫上亂
君之耳目下使羣臣皆失其職豈不誠足患哉公曰如
是乎寡人將去之晏子曰公不能去也公忿然作色不

說曰夫子何小寡人甚也對曰臣何敢槁也夫能自周于君者才能皆非常也夫藏大不誠于中者必謹小誠于外以成其大不誠入則求君嗜欲能順之公怨良臣則具其往失而益之出則行威以取富夫何密近不為大利變而務與君至義者也此難得具知也公曰然則先聖奈何對曰先聖之治也審見賓客聽治不留羣臣皆得畢其誠讒諛安得容其私公曰然則夫子抑寡人止之寡人亦事勿用對曰讒夫佞人之在君側者若社

之有鼠也諺言有之曰社鼠不可熏去讒佞之人隱君
之威以自守也是難去焉

晏子春秋卷七

晏子春秋卷八

外篇

晏子聘于吳吳王問君子之行何如晏子對曰君順懷之政治歸之不懷暴君之祿不居亂國之位君子見兆則退不與亂國俱滅不與暴君偕亡

晏子使吳吳王曰寡人得寄僻陋蠻夷之鄉希見教君子之行請私而無為罪晏子蹵然辟位吳王曰吾聞齊

君蓋賊以侵野以暴吾子容焉何甚也晏子導而對曰
吾聞之微事不通麤事不能者必勞大事不得小事不
為者必貧大者不能致人小者不能至人之門者必困
此臣之所以仕也如臣者豈能以道食人者哉晏子出
王笑曰嗟乎今日吾譏晏子訾猶僇而高櫬者也

仲尼曰靈公汙晏子事之以整齊莊公壯晏子事之以
宣武景公奢晏子事之以恭儉君子也相三君而善不
通下晏子細人也晏子聞之見仲尼曰嬰聞君子有譏

于嬰是以來見如嬰者豈能以道食人者哉嬰之宗族待嬰而祀其先人者數百家與齊國之間士待嬰而舉火者數百家臣為此仕者也如臣者豈能以道食人者哉晏子出仲尼送之以賓客之禮再拜其辱反命門弟子曰救民之姓而不夸行補三君而不有晏子果君子也

司馬子期間晏子曰士亦有不干君不恤民徒居無為而取名者乎晏子對曰嬰聞之能足以贍上益民而不

為者謂之不仁不仁而取名者嬰未得聞之也

高子問晏子曰子事靈公莊公景公皆敬子三君之心一耶夫子之心三也晏子對曰善哉問事君嬰聞一心可以事百君三心不可以事一君故三君之心非一也而嬰之心非三心也且嬰之于靈公也盡復而不能立之政所謂僅全其四支以從其君者也及莊公陳武夫尚勇力欲辟勝于邪而嬰不能禁故退而埜處嬰聞之言不用者不受其祿不治其事者不與其難吾于莊公

行之矣今之君輕國而重樂薄于民而厚于養藉歛過
量使令過任而嬰不能禁嬰庸知其能全身以事君乎
晏子治東阿三年景公召而數之曰吾以子為可而使
子治東阿今子治而亂子退而自察也寡人將加大誅
于子晏子對曰臣請改道易行而治東阿三年不治臣
請死之景公許于是明年上計景公迎而賀之曰甚善
矣子之治東阿也晏子對曰前臣之治東阿也屬託不
行貨賂不至陂池之魚以利貧民當此之時民無飢君

反以罪臣今臣後之東阿也屬託行貨賂至并重賦歛
倉庫少內便事左右陂池之魚入于權宗當此之昔飢
者過半矣君廼反迎而賀臣愚不能復治東阿願乞骸
骨避賢者之路再拜便辟景公廼下席而謝之曰子彊
復治東阿東阿者子之東阿也寡人無復與焉

晏子相景公其論人也見賢而進之不同君所欲見不
善則廢之不辟君所愛行已而無私直言而無諱有納
書者曰廢置不周于君前謂之專出言不諱于君前謂

之易專易之行存則君臣之道廢矣吾不知晏子之為忠臣也公以為然晏子入朝公色不悅故晏子歸備載使人辭曰嬰故老悖無能毋敢服壯者事辭而不為臣退而窮處東畔海濱堂下生藜藿門外生荊棘七年燕魯分爭百姓惛亂而家無積公自治國權輕諸侯身弱高國公恐復召晏子晏子至公一歸七年之祿而家無藏晏子立諸侯忌其威高國服其政燕魯貢職小國皆朝晏子沒而後衰

晏子使高糾治家三年而辭焉。僂者諫曰：「高糾之事夫子三年，曾無以爵位而逐之，敢請其罪。」晏子曰：「若夫方立之人，維聖人而已。如嬰者，仄陋之人也。若夫左嬰右嬰之人，不舉曰維將不正。今此子事吾三年，未嘗弼吾過也。吾是以辭之。」

景公問太卜曰：「汝之道何能對？」曰：「臣能動地。」公召晏子而告之。曰：「寡人問太卜曰：『汝之道何能對？』曰：『能動地。』地可動乎？」晏子默然不對。出見太卜曰：「昔吾見鈞星在四」

心之間地其動乎太卜曰然晏子曰吾言之恐子死之也默然不對恐君之惶也子言君臣俱得焉忠于君者豈必傷人哉晏子出太卜走入見公曰臣非能動地地固將動也陳子陽聞之曰晏子默而不對者不欲太卜之死也往見太卜者恐君之惶也晏子仁人也可謂忠上而惠下也

景公謂晏子曰昔吾先君桓公予管仲狐與穀其縣十七著之于帛申之以策通之諸侯以為其子孫賞邑寡

人不足以辱而先君今為夫子賞邑通之子孫晏子辭
曰昔聖王論功而賞賢賢者得之不肖者失之御德修
禮無有荒怠今事君而免于罪者其子孫奚宜與焉若
為齊國大夫者必有賞邑則齊君何以共其社稷與諸
侯幣帛嬰請辭遂不受

景公賜晏子狐之白裘玄豹之氍其貲千金使梁丘據
致之晏子辭而不受三反公曰寡人有此二將欲服之
今夫子不受寡人不敢服與其閉藏之寧如弊之身乎

晏子曰君就賜使嬰修百官之政君服之上而使嬰服之于下不可以為教固辭而不受

右複篇

仲尼之齊見景公景公說之欲封之以爾稽以告晏子晏子對曰不可彼浩裾自順不可以教下好樂綏于民不可使親治立命而建事不可守職厚葬破民貧國久喪道哀費日不可使子民行之難者在內而傳者無其外故異于服勉于容不可以道衆而馴百姓自大賢之滅周室之卑也威儀加多下行薄樂樂繁充而世

德滋衰今丘盛聲樂以多也飾弦歌詠詩以聚徒繁

登降之禮遠翔之節以觀傳學不可儀世勞思不

可以補民兼壽不能殫其富年不能究其禮積財不

能贍其樂繁飾邪術以營君盛為聲樂以淫愚其民

也不可以示其也不可以導民今欲封之以移齊國

之俗非所以導民也曰善于是厚其禮而留其

敬見不問其道也一廼行

景公上路寢聞哭聲曰吾左聞哭聲何為者也梁丘據

對曰魯孔丘之徒鞠語者也明于禮樂審于服喪其母
死塋埋甚厚服喪三年哭泣甚疾公曰豈不可哉而色
悅之晏子曰古者聖人非不知能繁登降之禮制規矩
之節行表綴之數以教民以為煩人留日故制禮不羨
于便事非不知能揚干戚鐘鼓竽瑟以勸衆也以為費
財留工故制樂不羨于和民非不知能累世殫國以奉
死哭泣處哀以持久也而不為者知其無補死者而深
害生者故不以導民今品人飾禮煩事羨樂淫民崇死

以害生三者聖王之所禁也賢人不用德毀俗流故三
邪得行于世是非賢不肖雜上妄說邪故好惡不足以
導衆此三者路世之政單事之教也公曷為不察聲受
而色悅之

仲尼游齊見景公景公曰先生奚不見寡人宰乎仲尼
對曰臣聞晏子事三君而得順焉是有三心所以不見
也仲尼出景公以其言告晏子晏子對曰不然嬰為三
心三君為一心故三君皆欲其國之安是以嬰得順也

嬰聞之是而非之非而是之猶非也孔丘必據處此一心矣

仲尼之齊見景公而不見晏子子貢曰見君不見其從政者可乎仲尼曰吾聞晏子事三君而順焉吾疑其為人晏子聞之曰嬰則齊之世民也不維其行不識其過不能自立也嬰聞之有幸見愛無幸見惡誹譽為類聲響相應見行而從之者也嬰聞之以一心事三君者所以順焉以三心事一君者不順焉今未見嬰之行而非

其順也嬰聞之君子獨立不慙于影獨寢不慙于魂孔子拔樹削跡不自以為辱窮陳蔡不自以為約非人不得其故是猶澤人之非斤斧山人之非網罟也出之其口不知其困也始吾望傳而貴之今吾望傳而疑之仲尼聞之曰語有之言發于爾不可止于遠也行存于身不可掩于衆也吾竊議晏子而不中夫人之過吾罪幾矣丘聞君子過人以為友不及人以為師今丘失言于夫子譏之是吾師也因宰我而謝焉然仲尼見之

景公出田寒故以為渾猶顧而問晏子曰若人之衆則有孔子焉乎晏子對曰有孔子焉則無有若舜焉則嬰不識公曰孔子之不逮舜為間矣曷為有孔子焉則無有若舜焉則嬰不識晏子對曰是廼孔子之所以不逮舜孔子行一節者也處民之中其過之識況乎處君之中乎舜者處民之中則自齊乎士處君子之中則齊乎君子上與聖人則固聖人之林也此廼孔子之所以不逮舜也

仲尼相魯景公患之謂晏子曰隣國有聖人敵國之憂也今孔子相魯若何晏子對曰君其勿憂彼魯君弱主也孔子聖相也君不如陰重孔子設以相齊孔子強諫而不聽必驕魯而有齊君勿納也夫絕于魯無主于齊孔子困矣居暮年孔子去魯之齊景公不納故困于陳蔡之間

景公問晏子曰天下有極大乎晏子對曰有足游浮雲背凌蒼天尾偃天間躍啄北海頸尾咳於天地乎然而

渺渺不知六嗣之所在公曰天下有極細乎晏子對曰
有東海有蟲巢於蟲睫再乳再飛而蟲不為驚臣嬰不
知其名而東海漁者命曰焦冥

莊公闔門而圖莒國人以為有亂也皆操長兵而立于
閭公召睢休相而問曰寡人闔門而圖莒國人以為有
亂皆操長兵而立于衢閭奈何休相對曰誠無亂而國
以為有則仁人不存請令于國言晏子之在也公曰諾
以令于國孰謂國有亂者晏子在焉然後皆散兵而歸

君子曰夫行不可不務也晏子存而民心安此非一日之所為也所以見于前信于後者是以晏子立人臣之位而安萬民之心


景公游于菑聞晏子死公乘侈輿服繁駟驅之而因為遲下車而趨知不若車之邀則又乘比至于國者四下而趨行哭而往伏尸而號曰子大夫日夜責寡人不遺尺寸寡人猶且淫佚而不收怨罪重積于百姓今天降禍于齊不加于寡人而加于夫子齊國之社稷危矣百

姓將誰告夫

晏子死景公操玉加于晏子而哭之涕沾襟章子諫曰
非禮也公曰安用禮乎昔者吾與夫子遊于公邑之上
一日而三不聽寡人今其孰能然乎吾失夫子則亡何
禮之有免而哭哀盡而去

右駁篇

晏子春秋卷八



總校官庶吉士臣張能照
校對官編修臣裴謙
鑒錄監生臣金士虞